



REPUBLIKA E KOSOVËS / REPUBLIKA KOSOVA

GJYKATA THEMELORE MITROVICË

Numri i lëndës: 2020:124017

Datë: 03.04.2024

Numri i dokumentit: 05538528

**P.nr.324/2021**

### **NË EMËR TË POPULLIT**

**GJYKATA THEMELORE NË MITROVICË** – Departamenti i Përgjithshëm - Divizioni Penal, Gjyqtarja e vetme gjykuese Qëndresa Tahiri - Islami, me procesmbajtësen Fatjona Fejza, në çështjen penale ndaj të akuzuarit V.F, për shkak të veprës penale: Përdorimi i armës apo mjetit të rrezikshëm nga neni 375 par.1 të KPRK-së, sipas Aktakuzës së Prokurorisë Themelore në Mitrovicë - Departamenti i Përgjithshëm PP/IL.nr.555/19 të datës 26.04.2021, pas mbajtjes së seancës së shqyrtimit fillestar me datë 11.03.2024, në mungesë të Prokurorit të Shtetit Ajtene Zoni, të akuzuarit V.F, si dhe mbrojtësit të akuzuarit av.Festim Shala me datë 11.03.2024 mori dhe publikisht shpalli, ndërsa me datë 03.04.2024, përpiloi këtë:

### **A K T G J Y K I M**

I akuzuari:

V.F, me nofkën "...", nga i ati B..., e ëma H..., e vajzërisë S..., i lindur me datë ...., me vendqëndrim në F..., me numër personal ....., i pa punë, i pamartuar, ka të kryer shkollën e mesme teknike, shqiptar, shtetas i Republikës së Kosovës.

### **ËSHTË FAJTOR**

#### **Sepse:**

Me datë 15.08.2013 në fshatin B..., Komuna e M... pa autorizim dhe në kundërshtim me ligjin në fuqi në lidhje me armët e ka përdorur një pushkë automatike AK 47 "Kallashnikov" me numër serik ..., në mënyrë që gjatë punimeve dhe vendosjes së pllakës në shtëpinë e vëllait të tij ka shtënë në ajër, duke i shkrepur 18 plumba nga arma në fjalë.

-Me këtë ka kryer veprën penale Përdorimi i armës apo mjetit të rrezikshëm nga neni 375 par.1 të KPRK-së, (Kodi Penal i Republikës së Kosovës 04/L-082).

Andaj Gjykata në bazë të neneve: 1, 4, 7, 8, 9, 10, 17, 21, 41, 43, 49, 50, 51, 52, 73,74, 75, 76 lidhur me nenin 375 par.1 të KPRK-së, dhe neneve: 364, 449, 452 të KPP-së, të akuzuarit, i:

## **S H Q I P T O N**

- I. DËNIM ME BURGIM në kohëzgjatje prej njëmbëdhjetë (11) muajve, i cili dënim nuk do të ekzekutohet nëse i pandehuri nuk kryen vepër tjetër penale gjatë periudhës së verifikimit në kohëzgjatje prej dy (2) viteve, nga plotfuqishmëria e këtij aktgjykimi.
- II. Në mbështetje të nenit 375 par.3 të KPRK-së e lidhur me nenin 276 par.2, nën-par 2.1 të KPP-së, ndaj të pandehurit URDHËROHET, konfiskimi i përhershëm i sendeve dhe atë: Arma- pushka automatike AK-47, prodhimi Zastava Kragujevac Jugosllavia, me numër serik ....; një karikator; një fishek; dhe tetëmbëdhjetë (18) gëzhoja.
- III. OBLIGOHET i akuzuari që në emër të shpenzimeve procedurale dhe atë në emër të paushallit gjyqësor të paguaj shumën prej tridhjetë (30) euro, në emër të fondit të kompensimit të viktimave të krimit shumën prej njëzet (20) euro, të gjitha këto në afat prej 15 ditësh nga dita e plotfuqishmërisë së këtij aktgjykimi.
- IV. Kërkesë pasurore-juridike nuk kishte.

## **A r s y e t i m i**

Prokuroria Themelore në Mitrovicë - Departamenti i Përgjithshëm, ka ngritur Aktakuzën PP/II.nr.555/19 të datës 26.04.2021, kundër të akuzuarit V.F, për shkak të veprës penale Përdorimi i armës apo mjetit të rrezikshëm nga neni 375 par.1 të KPRK-së.

Gjykata ka caktuar dhe mbajtur seancën e shqyrtimit fillestar me datë 06.03.2024, në të cilën ka prezantuar Prokurori i Shtetit Ajtene Zoni, i akuzuari V.F dhe mbrojtësi i tij av.Festim Shala.

Pas leximit të aktakuzës nga ana e Prokurorit të Shtetit, Gjyqtarja e vetme gjykuese e ka njoftuar të pandehurin lidhur me të drejtat e tij në këtë çështje penale dhe pasi që është bindur se i

pandehuri i ka kuptuar udhëzimet e gjykatës, të njëjtit i është dhënë mundësia që të deklarohet lidhur me fajësinë, ashtu që në këtë seancë i pandehuri lidhur me pranimin e fajësisë ka deklaruar se ndjehet fajtor dhe se e pranon fajësinë për veprën penale për të cilën akuzohet sipas aktakuzës.

Prokurori i shtetit, lidhur me pranimin e fajësisë nga ana e të pandehurit ka deklaruar se pajtohet me pranimin e fajësisë nga ana e të pandehurit, ngase pranimi i fajësisë është dhënë në mënyrë vullnetare, dhe pas konsultimit të mjaftueshëm me mbrojtësin e tij, konform dispozitave ligjore të nenit 242 të KPP-së, pranimi i fajësisë ka mbështetje në provat të cilat gjenden në shkresat e lëndës.

Mbrojtësi i të pandehurit V.F, av.Festim Shala lidhur me pranimin e fajësisë, i ka propozuar gjykatës që të pranoj pranimin e fajësisë, pasi është bërë në mënyrë vullnetare pas konsultimit të mjaftueshëm edhe me të si mbrojtës dhe është në përputhje me provat të cilat gjenden në shkresat e lëndës.

Gjykata, ka shqyrtuar pranimin e fajësisë të cilën e ka deklaruar i akuzuari, e në mbështetje të nenit 242 të KPP-së, në këtë drejtim ka vlerësuar se janë përmbushur kushtet ligjore për miratimin e fajësisë për të akuzuarin.

Gjykata ka vërtetuar se pranimi i fajësisë nga ana e të akuzuarit mbështetet në provat me të cilat disponon kjo gjykatë si: Raporti i ekspertizës AKF/2014 – 1743/2014 – 1436, i datës 23.05.2014; Raporti fillestar i incidentit me numër të rastit 2013-BC-1232, i datës 15.08.2013; Procesverbali i marrjes në pyetje të pandehurit V.F i datës 15.08.2013; Raporti i oficerit me numër të rastit 2013-BC-1232, i datës 15.08.2013; Raporti i policit hetues nga vendi i ngjarjes me numër të rastit 2013-BC-1232, i datës 15.08.2013; Shënimi zyrtar me numër të rastit 2013-BC-1232, i datës 15.08.2013; Fotoalbumi me gjithsej 9 fotografi; Vërtetimi mbi marrjen e sendeve, si dhe shkresat tjera të lëndës.

Të gjitha këto prova janë bindëse për gjykatën dhe formojnë elementin inkriminues e që në bazë të këtyre provave dhe pranimin të fajësisë, konsiderojmë se përtej çdo dyshimi është vërtetuar se i akuzuari ka kryer veprën penale që i vihet në barrë.

Gjykata, ka vërtetuar se pranimi i fajësisë nga ana e të pandehurit është bërë në mënyrë vullnetare, se i pandehuri ka kuptuar natyrën dhe pasojat e pranimin të fajësisë, duke i' u tërhequr

vërejtja të pandehurit se pas pranimit të fajësisë, ai nuk mund të bëjë ankesë për shkak të konstatimit të gabuar të gjendjes faktike, por vetëm sa i përket llojit dhe lartësisë së dënimit, gjykata ka vërtetuar se aktakuza nuk përmban asnjë shkelje të qartë ligjore ose gabim faktik, nga këto arsye gjykata ka aprovuar pranimin e fajësisë të bërë nga i pandehuri.

Gjykata, nga pranimi i fajësisë së të pandehurit dhe nga provat e cekura si më lartë, ka vërtetuar përtej dyshimit të bazuar se i akuzuari V.F ka kryer veprën penale: Përdorimi i armës apo mjetit të rrezikshëm nga neni 375 par.1 të KPRK-së, e për të cilën veprë është paraparë dënimi me burgim prej një (1) deri në tetë (8) vjet.

Lidhur me llojin dhe lartësinë e dënimit gjykata ka pasur parasysht vlerësimin e rrethanave lehtësuese dhe rënduese për matjen e dënimit në mbështetje të nenit 73 dhe 74 të KPRK-së. Gjykata, si rrethanë veçanërisht lehtësuese ka vlerësuar pranimin e fajësisë në tërësi për veprën penale nga i akuzuari në seancën e shqyrtimit fillestar, shprehjen e keqardhjes për rastin e ndodhur, i njëjti ka treguar sjellje të mirë në gjykatë, si dhe faktin se nga kryerja e veprës penale ka kaluar një kohë mjaftë e gjatë më shumë se dhjetë (10) vite. Ndërsa, rrethana rënduese gjykata vlerësoj peshën dhe rrezikshmërinë e kësaj vepre penale.

Gjykata ka aplikuar dispozitat e zbutjes së dënimit sa i përket veprës penale: Përdorimi i armës apo mjetit të rrezikshëm, pasi që në rastin konkret janë plotësuar kushtet ligjore për zbutje në kuptim të nenit 75 par. 1 nën par. 1.3 të KPRK-së, pasi që i pandehuri e ka pranuar fajësinë. Megjithatë, me rastin e zbutjes së dënimit janë respektuar kufijtë e zbutjes në kuptim të nenit 76 par. 1 nën par. 1.5 të KPRK-së. Në këtë situatë, atëherë gjykata, pasi i ka aplikuar dispozita e zbutjes së dënimit, në kuptim të nenit 49, 50, 51 dhe 52 ka shqiptuar dënimin me kusht me burgim në kohëzgjatje prej 11 (njëmbëdhjetë) muaj, me kohë të verifikimit prej 2 (dy) viteve ndaj të akuzuarit.

Gjykata vlerëson se dënimi i shqiptuar si në dispozitivin e aktgjykimit, është në proporcion me peshën e veprës penale, me sjelljen dhe rrethanat e kryesit, me shkallën e rrezikshmërisë shoqërore dhe përgjegjësinë e kryesit, me bindje se dënimi i tillë do të ndikoj në risocializimin dhe riedukimin e kryesit, si dhe do të ndikoj tek të tjerët të mos kryejnë vepra penale, ngritjen e moralit dhe forcimin e detyrimit për respektimin e ligjit, çka është edhe qëllimi i dënimit sipas nenit 41 të KPRK-së.

Vendimi për kompensimin e shpenzimeve të procedurës penale dhe të paushallit gjyqësor, u mor në bazë të nenit 449 par. 2 nën par. 2.6 lidhur me par.1 dhe nenit 452 par. 1 të KPPK-së. Ndërsa taksa për kompensimin viktimave të krimit, në kuptim të nenit 36 par. 3 nën. par 3.1 të Ligjit nr.08/L-109 për Kompensimin e Viktimave të Krimit.

Andaj gjykata duke u bazuar me neni 364, 452, 462 të KPPK-ës, nga arsyet e lartcekura ka vendosur si në dispozitiv të këtij Aktgjykimi.

**GJYKATA THEMELORE NË MITROVICË**  
**Departamenti i përgjithshëm - Divizioni Penal**  
**P.nr.324/2021, të datës: 03.04.2024**

**Procesmbajtësja**  
**Fatjona Fejza**

**Gjyqtarja e vetme gjykuese**  
**Qëndresa Tahiri- Islami**

**Këshillë juridike:** Kundër këtij aktgjykimi palët kanë të drejtë ankese në Gjykatën e Apelit Prishtinë, në afat prej tridhjetë (30) ditësh, llogaritur nga dita e pranimit të tij. Ankesa dorëzohet përmes kësaj Gjykate, në kopje të mjaftueshme për palët dhe gjykatën.